

CHRISTMAS YOG TXOJ MOO ZOO

Peb yuav pom thiab hnov ntau yam nyob rau lub caij Christmas, tabsis ib yam ntawm ntau ntau yam uas tshwm nyob rau lub caij Christmas lossis sijhawm Tswv Yexus yug yog "Txoj Moo Zoo." Nws muaj ib tug timtswv Ceebtsheej hais rau cov tub yug yaj tias, "Nej tsis txhob ntshai! Kuv los ntawm no yog coj Txoj Moo Zoo uas yog txoj kev zoo siab kawg nkaus rau txhua haivneeg los qhia rau nej paub. Hnub no nej tus Cawmseej twb yug los rau hauv Daviv lub nroog lawm, Nws yog Khetos uas yog tus Tswv!" (Lukas 2:10-11).

Txoj Moo Zoo uas tus timtswv no hais twb muaj rau lub ntiaj teb no tau ntau tshaj li ob txhiab lub xyoos los lawm, tabsis txoj Moo Zoo no yog licas tiag. Yog licas thiaj hais tias, "Christmas yog Txoj Moo Zoo?" Kuv yuav coj peb mus kawm txog peb yam uas yuav ua rau peb pom meej tias "Christmas yog Txoj Moo Zoo."

Qhov ib, Christmas yog Txoj Moo Zoo rau qhov Tswv Yexus txaus siab los nyob hauv peb lub neej txhaum (Christ was willing to come into our sinful lives). Vajtswv Txojlus qhia meej tias



Tswv Yexus yeej yog Vajtswv. Nws yog tus muaj txoj sia nyob ibtxhis, thiab Nws yog tus tsim txhua yam hauv ntiaj teb no (Yauhas 1:1-3). Yog Tswv Yexus twb yog Vajtswv ces peb paub tias Tswv Yexus yeej muaj hwjchim heev, zoo tshajplaws, thiab dawbhuv tshajplaws. Yog li ntawd, Tswv Yexus yeej tsimnyog los yug rau qhov chaw uas zoo tshajplaws, tabsis Tswv Yexus ho xaiv los yug rau hauv lub nkuajyug (Lukas 2:7).

Peb paub tias nkuajnyug yog ib qho chaw rau nyuj nyob, thiab nws yog ib qho chaw phem, qias,

thiab tsw ntxhiab heev; tabsis yog vim licas Tswv Yexus ho yug los rau qhov chaw zoo li no?

Tswv Yexus yug los rau qhov chaw zoo li no thiaj ua tau rau peb pom tias "Christmas yog Txoj Moo Zoo" tiag. Koj thiab kuv nrog rau ntiaj teb tibneeg tus kheej thiab lub neej yeej zoo ib yam li lub nkuajnyug. Peb lub neej yeej puvnpo txoj kev phem, qias, thiab tsw ntxhiab. Nws tsis muaj leejtwg xav los nyob rau hauv peb vim peb yeej tsis phim thiab tsis tsimnyog rau leejtwg los nyob rau hauv peb; tabsis Tswv Yexus ibleeg txaus siab thiab zoo siab hlo los nyob rau hauv peb lub neej. Tswv Yexus twb los nyob tau rau hauv nkuajnyug uas yog qhov chaw phem, qias, thiab tsw ntxhiab kawg nkaus ces Nws yeej los nyob tau rau hauv peb lub neej tib yam nkaus.

Qhov nov thiaj ua rau peb pom tias "Christmas yog Txoj Moo Zoo" vim Tswv Yexus tus uas zoo zoo cia li txaus siab los nyob hauv peb lub neej txhaum thiab phem phem, qias qias, thiab tsw ntxhiab no.

Qhov ob, Christmas yog Txoj

Moo Zoo rau qhov Tswv Yexus los hloov peb lub neej txhaum (*He came to transform our sinful lives*). Tswv Yexus tsis yog txaus siab los nyob hauv peb lub neej txhaum xwb, tabsis Nws los kom hloov tau peb lub neej txhaum no ntag.

Lub nkuajnyug yog ib qho chaw phem, qias, thiab tsw txhiab heev; tabsis hnuv Tswv Yexus los nyob rau hauv lawd, qhov chaw ntawd raug hloov dua tshiab. Lub nkuajnyug cia li yog qhov chaw rau tus Cawmseej nyob thiab pw, rau Yauxej thiab Maivliag nyob, noj, thiab pw. Nws dhau mus ua ib qho chaw uas cooblej tuaj cuag, ntsib, thiab pehawm tus Cawmseej. Lukas 2:16, 22 qhia tias cov tub yug yaj tuaj pom Maivliag, Yauxej, thiab tus mi Tub Yexus pw hauv lub dabzaub nyuj. Qhov nov ua rau lawv zoo siab kawg thiab qhuas Vajtswv.

Koj thiab kuv lub neej yeej tsis muaj qhov zoo ib yam li lub nkuajnyug; tabsis hnuv Tswv Yexus los nyob rau hauv peb lawd, peb lub neej tau raug hloov dua tshiab. Peb dhau mus ua qhov chaw rau tus Cawmseej nyob, rau Vajtswv tus Ntsujplig nyob (1 Kauleethaus 6:19), thiab yog qhov chaw rau lwm tus ntsib Vajtswv.

Peb pom Maivliag Madalas yog ib tug pojniam uas raug xya tus dab. Nws lub neej nyob nrog txoj kev tsaus ntuj thiab lwm tus los ntshai nws; tabsis hnuv uas Tswv Yexus los nyob rau hauv nws lawd, hnuv ntawd los nws yog ib tug tibneeg hloov dua tshiab

lawm. Nws lub neej yog ib lub neej uas ua haujlwm rau tus Cawmseej thiab nyob nrog txoj kev zoo siab (Lukas 8:1-3; Mk. 15:47; 16:1-9).

Peb lub neej los zoo tib yam li ntawd thiab. Peb twb tsis tsimnyog li, tabsis thaum Tswv Yexus los nyob hauv peb lub neej ces peb yog neeg tshiab lawm. 2 Kauleethaus 5:17 hais tias, “*Yog li ntawd, yog leejtwg los nyob hauv Tswv Yexus Khetos, nws yog ib tug tibneeg tshiab; yam qub twb dhau mus tag lawm, (thiab) yam tshiab twb los lawm.*” Qhov nov thiaj ua rau peb paub tias, “*Christmas yog Txoj Moo Zoo*” tiag.

Qhov peb, Christmas yog Txoj Moo Zoo vim Tswv Yexus ua rau peb lub neej txhaum nto moo

(*He popularized our sinful lives*). Tswv Yexus tsis yog txaus siab los nyob thiab hloov peb lub neej txhaum xwb, tabsis Nws los ua rau peb lub neej txhaum nto moo rau txoj kev nto moo zoo.

Peb paub tias muaj qas puas qas txhiab lub nkuajnyug nyob rau lub ntiajteb no, tabsis lub nkuajnyug uas nto moo tshajplaws yog lub nkuajnyug uas Tswv Yexus yug. Qhov uas ua rau lub nkuajnyug ntawd nto moo vim yog Tswv Yexus Vajtswv Leej Tub los yug nyob rau hauv. Tus timtswv qhia cov yug yaj tias, “*Qhov nov yuav yog ib lub cim rau nej: Nej yuav pom ib tug minyuam mos qhwv ntaub thiab pw nyob hauv ib lub dabzaug nyuj*” (Lukas 2:12). Cov tub yug yaj pom Tswv Yexus pw hauv lub

dabzaub nyuj, thiab lawv qhia tej uas lawv pom ntawd rau sawv-daws (Lukas 2:16-17).

Peb yeej tsis nto moo thiab tsis tsimtxiaj li; tabsis thaum Tswv Yexus los nyob hauv peb lawd, Nws ua rau peb nto moo. Peb nto npe los ua Vajtswv cov minyuam, cov ntseeg Vajtswv, cov tibneeg dawbhuv – *the saints* (Efexaus 1:1), thiab neeg qaumntug (Filipis 3:20). Tswv Yexus qhia tias thaum muaj ib tug tibneeg txhaum twg tso nws txoj kev txhaum thiab los ntseeg Vajtswv mas cov timtswv Ceebtsheej zoo siab heev nyob ntawm Vajtswv lub xubntiag (Lukas 15:10).

Peb twb tsis tsimnyog thiab tsis nto moo li, tabsis Tswv Yexus los, Nws ua rau peb nto moo lug hauv lub ntiajteb no thiab saum ntuj huv tibi. Qhov nov thiaj ua rau peb pom tias “*Christmas yog Txoj Moo Zoo*” tiag.

Yog li ntawd, peb tsimnyog yuav los ua Vajtswv tsaug uas “*Christmas yog Txoj Moo Zoo*” rau peb. Qhov uas peb yuav tau nco thiab ua yog xa “*Christmas uas yog Txoj Moo Zoo*” mus rau lwm tus nyob rau lub caij Christmas no. Nco ntsoov tias nws tseem tshuav tibneeg ntau plhom tsis tau paub tias “*Christmas yog Txoj Moo Zoo.*” Cia li qhia rau lwm tus kom lawv paub thiab tau txais “*Christmas ua lawv Txoj Moo Zoo.*”

✦ **Dr. Tswv Txos Thoj**, *D. Min. Ua xwbfbw rua pawg ntseeg Twin City Hmong Alliance Church.*